

Bon dia na miembro nan di Prensa y tur esnan presente den sintonia cu nos via diferente Plataforma. Mi nomber ta Nicole Martina y kier a jama danki pa accepta nos invitashon pa por ta aki cu nos awe pa nos por elabora riba loke ta trata e inscripcion di Festival di Tumba cu a tuma lugar ayera.

Sinta na mesa awe hunto nos tin DLS / SUONA / SHINE / BULERIA / 1 OAK.

Ayeranochi ta tin e inscripcion pa cu Festival di Tumba y hopi a nota cu nos sinta aki na mesa no a inscribri pa cu e Festival.

Nos a dirigi un carta informando SMAC cu e banda nan sinta akin a mesa cu ta DLS no lo ta participando na e Festival e anja aki. Permitimi lesa e carta y a base di esey nos lo elabora mas riba e punto nan .

Apreciable sr. van Ommeren,

Den nomber di e banda nan musical Buleria, DLS, Suona, Shine Music y 1 OAK nos ta participa na bo persona cu nos lo no ta participando na e Festival di Tumba 2024.

Den seno di maneho di e banda nan menciona nos a conclui cu a base di e sigiente punto nan e lo no ta alcansabel pa por participa e anja aki;

1) Falta di informacion y comunicacion.

- a. Na diferente ocasion desde aña pasa Maart 2023 a pidi pa reuni cu tur tumbero pa por concretisa punto nan importante pa por engrandece e festival. A hanja un reunion 22 di November 2023 cu a papia riba e topico di premio, hurado (incluyendo hurado di exterior), participacion di tumbero nan di exterior, adaptacion di regla, produccion, ingeniero di zonido y pa agrega categoria Tumba Loco. Notulen y confirmacion oficial no a ricibi te cu awe 10 di Januari 2024.
- b. 9 di Januari 2024 a hanya un reunion di urgencia jama pa bo persona, a peticion di musico pa por hanja un update riba e Festival cual esnan presente a expresa nan preocupacion riba e nivel y interes di e organizacion di e Festival.
- c. Den e reunion di 9 di Januari a informa esnan presente kico e premionan lo ta y tambe cu a crea un premio pa e categoria di Tumba Loco. A hisa e premio pa cu e banda premia cual a wordo informa den e reunion di urgencia. Lamentablemente si no tabata pa e musico nan mes e informacion lo no ta conoci ainda.

2) Falta di promocion pa cu Festival.

- a. Promocion pa cu Inscricion di e Festival na Balashi Beer Garden a wordo promovi 1 dia prome.
- b. Esnan presente den reunion a wordo informa cu dialuna 14 di Januari 2024 e evento su flyer oficial lo por sali. Pa por promove y engrandese e festival, esaki ta mucho poco tempo.

Tumando e punto nan menciona den consideracion, a opta pa no hasi uso di e pre- inscripcion pa cu e Festival di Tumba sperando confirmacion pa e topico nan cu a papia riba dje.

Tumba ta rekeri un preparacion diferente cu otro festival nan. Sin claridad riba e topico nan menciona no por prepara debidamente pa e festival.

Composicion, areglo y musico nan pa Tumba tin necesidad di inversion nan adicional pa cada participante y banda. ROI pa un participante y banda ta e publico cu lo ta presente pa por disfruta. Sin informacion debido y na tempo ningun participante of banda lo por tuma desicion si ta bai inverti den e festival.

Nos vision pa 2025 ta:

- 1) Pa e genero di Tumba wordo inclui y reconoci den e temporada di Carnaval.
- 2) Pa e Festival di Tumba su calidad wordo eleva.
- 3) Pa e Festival aki wordo produci y dirigi door di un organisacion dedica.
 - Organisacion mester ta consisti di Musico cu e nocion di e genero y un organisacion cu experencia pa organisa evento di e magnitud aki.

E ta lamentabel cu mester a jega na un desicion di e extremo aki ,mirando cu nos tin e Festival di Tumba na curason y cu e no ta ricibiendo su debido atencion y balor.

Nos lo ta desea un reunion cu bo persona pa por presenta nos proposicion pa Festival di Tumba 2025.

Saludos musical,

Buleria	–	Nicole Martina
DLS	–	Glennrick Curie
Suona	–	Raul Piar
Shine Music	–	Reggerick Curie
1 OAK	–	Jurick Salomon

Esaki ta e carta cu nos a dirigi na Presidente di SMAC 10 di Januari p 3:45 PM.

Nos cu a expresa nos preocupacion a bini hunto y a delibera y a elabora riba tur loke ta pasando acutalmente.

Nos tin di sali na bisa Presidente di SMAC cu nos ta aprecia e esfuerso cu su persona y su team a hinka den Tumba anja pasa pa nos por a wak un Festival di Tumba 2023 exitoso di cual cu a wordo priminti cu e anja aki lo traha hunto pa hasi e Festival di 2024 uno mas grandi y exitoso mara na e celebrashon dia Carnaval 70 di Aruba.

Lamentablemente esaki no ta e caso y nos a hanja nos ta tuma e desishon di no participa.

Tin pregunta riba loke nos a informa.